



**Uunga siunnersuut Najukkani aatsitassanut tunngasunik suliaqarnerit pillugit Inatsisartut inatsisaat**

(Inuussutissarsiornermut, Niuernermet, Aatsitassanut, Inatsisit atuutsinneqarnerannut  
Naligiissitaanermullu Naalakkersuisoq)  
(Siullermeerneqarnera)

**Uunga siunnersuut Aatsitassat pillugit ingerlatallu tamatumunnga pingaarutillit pillugit inatsisartut inatsisaata (aatsitassanut ikummatissanullu inatsit) allanngortinneqarnissaa pillugu Inatsisartut inatsisaat**

(Inuussutissarsiornermut, Niuernermet, Aatsitassanut, Inatsisit atuutsinneqarnerannut  
Naligiissitaanermullu Naalakkersuisoq)  
(Siullermeerneqarnera)

Demokraatit isumaqarput, aatsitassarsiorneq nunatta siunissami aningaasaqarneranut pingaarutillit ilagigaat. Aammattaaq isumaqarpugut, nunaqavissut aatsitassanik paaanermi akuunissaat periarfissaqartariaqartoq. Isumaqarpugullu, uagut nunatut sapinngisamik aatsitassarsiorneq aningaasanik amerlanerpaanik iluanaarutigisariaqaripput.

Pingaartuusaaq naqissusissallugu, aatsitassat nunap ataaniiginnartillugit, sumilluunniit naleqanngimmata. Annerusumik minnerusumilluunniit.

Aatsitassanik qalluineq akisuvoq, taamaattumillu taakkuninga paaassagaanni avataaniit annertuumik aningaasaliisoqarnissaa pisariaqarluni. Tassani pingaartuuvoq oqimaqatigiissitsinissaq, maani uagut aningaasanik isaatitsinissarput aningaasaliisussat qimaatinnaversaarlugit. Uani eqqaamassarput, kinaluunniit aningaasaleerusukkunnangimmat, iluanaarutiginngikkuniuk.

Taamatuttaaq Demokraatinut pingaartuuvoq, nunatsinni najukkani aallarnisaasut annikitsumik aatsitassarsiornermut atortussiassanik- aamma aatsitassanik naleqquttumik tapersorneqarnissaat aammalu inatsimmi taamaaliornissaq allaffissornikkut assigisaannillu naalleraataassanngitsaq.

Tamanna tunngavigalugu pingaartuuvoq, pitsaasumik eqaatsumillu inatsiseqarnissarput, soqutiginnittunut tamanut atuuttussamik. Uuminnga siunnersuuteqarnikkut allaanngilaq Naalakkersuisut annikitsumik aatsitassarsiornermut pissutsinik pitsanngorsarusuttut, pilersaarutinut annertuunut ajoqutaanngitsumik.

Demokraatini siunertaq taanna isumaqatigaarput, erseqqissassalluguli, pingaartuuvoq, Inatsisartut sukumiisumik misissorpasuk, ilumut Naalakkersuisut siunertaq iluatsinneraat.

Tusarniaavigineqartut arlallit pingaartumik nunanit allanit ingerlatsiviit aammalu Sulisitsisut siunnersuut isumakuluutigaat. Isumakuluutigineqartoq annermik unaavoq, siunnersuuteqarnermi uani



aningaasaliisussanik nassaarniarneq ajornakusoornerulersissammagu aammalu atortussianik-aatsitassanillu pilersaarutitut aningaasaliinissat ajornakusuulissasut, minnerunngitsumik malitsigisaanik kisermaassisusaaatitaalluni pisinnaatitaaffiit atorunnaaratarsinnaammata. Taanna isumakuluut pinngitsoorani pimoorunneqartariaqarpoq. Pingaartuuvoq, ataatsimiititaliami sulinissami taassuma ukkatarineqarnissaa, immitsinnut naallerassanngikkutta siunissami isertitassaraluatsinnik.

Periarfissaasinnaassaaq inatsisiliornissaaq, suliniutitut angisuunut mikisunullu inissaqartitsisumik. Taakku marluullutik nunatsinnut pingaaruteqarput.

Ataatsimiititaliami sulinissami sukumiisumik tassunga sammisariaqarpoq aammalu uuma siunnersuutip tulluussarnissaa, suleqatigiit tamarmik iluarisaannik. Tassunga atatillugu naqissusissavara, iluarisimaaratsigu, inatsimmi naqissuserneqarmat, uuma siunnersuutip akuersissutit pioreersut kalluassanngimmagit aammalu uagut Inatsisartuni kingumut atuuttussanik inatsisiliussannginnatta.

Demokraatinut pingaartuuvoq, uagut Inatsisartut tungaanniit suliniutit ingerlareersut kalluassanngikkigut, tamanna kinguneqarsinnaammata, aningaasaleerusukkaluit qimaatinnerannik politikikkigut inatsisitigullu patajaatsuunngitsumik ingerlanitta kinguneranik. Pingaartuuvoq, nunatut, tatiginartutut, isumaqatigiissusiornermi, takutitsinissarput.

Taamatut oqaaseqaateqarluta siunnersuut ataatsimiititaliamut susassaqartumut ingerlateqqinneqarnissaa innersuussutigaaqarput.